

trouué avec eux; ie les excite incontinent à chercher quelque meschant lieu pour nous cabaner; en ayant fait rencontre, ils jettent leurs écorces sur cinq ou six perches: & bien leur en prit, & à moy aussi, dit le Pere; car nous fumes battus toute la nuit du vent & de la pluie,

Le lendemain ne pouuant aborder la barque, ie passay la grande feste de nostre Seigneur dans cette maison tres-pauvre des biens de la terre, mais richement pourueü des biens du ciel: La meilleure partie des Sauvages estoient Chrestiens; ie leur parlay de l'honneur qu'on rendoit ce iour là au Fils de Dieu avec pompe & magnificence, dans toute l'Europe: Là-dessus ie dressé vn petit Autel pour dire la sainte Messe; ils m'aidoient avec tant d'affection que i'en estois tout attendry: voyans que le lieu où ie deuois marcher, estoit tout humide & fangeux, ils jettent par terre vne robe pour me seruir de marche-pied. L'estendy vne petite nappe de communion au trauers de la cabane, pour separer les [186] fideles d'avec les infideles: Là dessus ie commence la sainte Messe, non sans estonnement, que le Dieu des dieux s'abaissast vne autre fois, dans vn lieu plus chetif que l'estable de Bethleem; ces bonnes gens se vouloient confesser & communier, mais ie les remis au Dimanche suiuant; les Sauvages qui n'estoient pas baptisés, garderent vn profond silence pendant ce diuin Sacrifice; aussi ont-ils bonne enuie d'estre Chrestiens.

La tempeste nous retint deux iours & deux nuits prisonniers sous ces écorces, plus ouuertes qu'vne porte cochere: Comme nous songions à nostre depart, le sieur Marfolet qui commandoit la barque, m'escriuit ce peu de mots par vn ieune Sauvage, qui m'ap-